



---

**JU OŠ „ŠEJH MUHAMED EF. HADŽIJAMAKOVIĆ“**

Na osnovu člana 108. a u vezi sa članom 20. stav (4) Zakona o odgoju i obrazovanju u osnovnoj i srednjoj školi u Kantonu Sarajevo („Službene novine Kantona Sarajevo“ broj: 27/24) i člana 123. Pravila JU OŠ „Šejh Muhamed ef. Hadžijamaković“ Sarajevo, Školski odbor na prijedlog Nastavničkog vijeća i uz konsultacije sa Sindikatом škole, a nakon provedene rasprave na Vijeću roditelja i Vijeću učenika na sjednici održanoj 14.10.2025. godini donosi

**PRAVILNIK O KUĆNOM REDU  
JU OŠ „ŠEJH MUHAMED EF. HADŽIJAMAKOVIĆ“ SARAJEVO**

**I – OPĆE ODREDBE**

**Član 1.**

**(Predmet Pravilnika)**

Ovim Pravilnikom o kućnom redu JU OŠ „Šejh Muhamed ef. Hadžijamaković“ Sarajevo (u daljem tekstu: Pravilnik) uređuju se pravila i obaveze ponašanja u školi, unutrašnjem i vanjskom prostoru, ulazak, boravak i kretanje u prostorijama škole, pravila međusobnih odnosa učenika, pravila međusobnih odnosa radnika škole, pravila međusobnih odnosa učenika i radnika škole, pravila sigurnosti i zaštite od socijalno-neprihvatljivih oblika ponašanja, diskriminacije, neprijateljstva i nasilja, zabrana svih oblika reklamiranja i prodaje proizvoda koji nisu u skladu sa etikom, načelima i ciljevima odgojno-obrazovnog rada, način postupanja prema imovini škole, postupak sa nađenim stvarima, kodeks odijevanja učenika i radnika.

**Član 2.**

**(Rodna neutralnost)**

Izrazi koji se koriste u ovom Pravilniku, bez obzira jesu li korišteni u muškom ili ženskom rodu, podrazumijevaju uključivanje oba roda na jednak način.

**Član 3.**

**(Upoznavanje sa odredbama Pravilnika)**

- (1) Sa odredbama ovog Pravilnika dužni su se upoznati svi radnici Škole, učenici i njihovi roditelji.
- (2) Pravilnik se objavljuje na oglasnoj ploči i zvaničnoj web stranici Škole.
- (3) Sažetak Pravilnika ističe se na vidljivom mjestu kod ulaznih vrata u Školu.

**II – PRAVILA I OBAVEZE PONAŠANJA U ŠKOLI, UNUTRAŠNJEM I VANJSKOM PROSTORU**

**Član 4.**

**(Prostor Škole)**

- (1) Prostor Škole obuhvata: dvorište, sportsko igralište, fiskulturnu salu, učionice i kabinete, produženi boravak, biblioteku, arhivu, kancelarije uprave i stručne službe, kotlovnice, radionicu, ostave, toalete i hodnike.
- (2) Škola ima glavni ulaz i sporedni ulazi.
- (3) Glavni ulaz se zaključava sa unutrašnje strane mehanizmom bez ključa, a sporedni ulaz je stalno zaključan, odnosno otključan prema potrebi.
- (4) Sve prostorije u Školi su zaključane kada se ne koriste.



**JU OŠ „ŠEJH MUHAMED EF. HADŽIJAMAKOVIĆ“**

- (5) Mokri čvorovi za učenike i prolazi na hodnicima su stalno otključani.
- (6) Prostorije u Školi su obilježene arapskim brojevima i simbolima.

**Član 5.**

**(Ulazak u Školu)**

- (1) Učenici, radnici i drugi posjetioci u Školu ulaze na glavni ulaz.
- (2) Izuzetno, učenici mogu ulaziti i na sporedni ulaz iz pravca školskog igrališta.
- (3) Ulaz u Školu je otvoren od 07:00 do 19:00 sati.
- (5) U Školi se koriste svi pozdravi.

**Član 6.**

**(Dolazak i odlazak učenika)**

- (1) Učenici u Školu ulaze 10 minuta prije početka nastave, a izlaze najkasnije 10 minuta nakon završetka školskih obaveza.
- (2) Ako učenik zakasni na školski čas 5 minuta, neće se zadržavati u dvorištu škole, hodnicima, toaletima ili drugim školskim prostorijama, već će odmah ući u učionicu i nastavniku pružiti obrazloženje o razlogu zakašnjenja. Po odobrenju nastavnika, odlazi na svoje mjesto.
- (3) Ako učenik zakasni duže od 5 minuta, neće mu se dozvoliti ulazak u školu do početka narednog časa. Izuzetno, može mu se odobriti da početak narednog časa sačeka u holu ispred prostorije dnevnog čuvara ili u biblioteci.
- (4) Nije dozvoljen boravak učenika u školskom prostoru izvan vremena predviđenog za školske obaveze (redovnu nastavu i vannastavne aktivnosti).
- (5) Izuzetno, zadržavanje u Školi je moguće ako učenici čekaju roditelje/staratelje za zajednički odlazak iz Škole.
- (6) Nastavnici koji realiziraju zadnje časove dužni su ispratiti učenike do izlaza iz Škole, prateći njihovo ponašanje.
- (7) Učenici koji koriste produženi boravak izlaze na sporedni izlaz kod kuhinje.

**Član 7.**

**(Dolazak i odlazak radnika Škole)**

- (1) Radnici Škole dolaze u Školu u skladu sa definisanim radnim vremenom, odnosno Rasporedom časova.
- (2) Radnici Škole mogu boraviti u školskom prostoru samo tokom radnog vremena, odnosno po odobrenju direktora izvan tog radnog vremena, ali ne poslije 20:00 sati.

**Član 8.**

**(Ulazak roditelja/staratelja i drugih lica u Školu)**

- (1) Roditelji/staratelji ulaze u Školu po unaprijed utvrađenim terminima informacija i konsultacija sa nastavnicima, odnosno po pozivu i dogovorenom terminu.
- (2) Ukoliko roditelji/staratelji dolaze u Školu izvan utvrđenih termina i bez poziva, dužni su se prijaviti dnevnom čuvaru, predati lični dokument i upoznati ga kod koga žele biti primljeni.
- (3) Dnevni čuvar će obavijestiti onoga koga roditelji/staratelji traže i provjeriti da li mogu biti primljeni. Za to vrijeme roditelji/staratelji će sačekati u holu škole.
- (4) Druga lica koja dolaze u Školu dužna su predočiti lični dokument dnevnom čuvaru i zatražiti da budu najavljeni kod radnika Škole kod kojeg dolaze. Nakon što dobiju odobrenje za posjetu traženom radniku Škole, dnevni čuvar će ih uputiti u odgovarajuću prostoriju.
- (5) Svi ulasci i izlasci posjetilaca moraju biti evidentirani pri čemu se evidentira ime i prezime, razlog posjete, vrijeme ulaska i vrijeme izlaska.



**JU OŠ „ŠEJH MUHAMED EF. HADŽIJAMAKOVIĆ“**

- (6) Roditelji/staratelji i druga lica ne mogu ući u Školu ukoliko su neprimjereno odjeveni. Pod neprimjerenim odijevanjem smatra se tijesna, uska, prozirna i pocijepana odjeća, kratka suknja (5 cm iznad koljena) i kratke hlače (iznad članaka), gornji dio odjeće bez rukava, majica bez leđa, japanke i papuče.
- (7) Dnevni čuvar može zabraniti ulazak u Školu u slučaju kada posjeta nije ranije dogovorena ili nema odobrenje direktora.
- (8) Roditelji/staratelji koji dolaze po učenike u produženom boravku ulaze na sporedni ulaz kod kuhinje.
- (9) U vrijeme održavanja većih skupova u Školi, školskih priredbi i drugih svečanosti, roditeljskih sastanaka, takmičenja i sl, direktor može odobriti da se ne vrši pojedinačna kontrola ulaska i izlaska u Školi.
- (10) Uniformisana službena lica (policijski službenici, službenici hitne medicinske pomoći, vatrogasci i sl) mogu bez legitimisanja ući u Školu u cilju obavljanja službene radnje.

**Član 9.**

**(Zadržavanje trećih lica u Školi i školskom dvorištu)**

- (1) Trećim licima, uključujući i roditelje/staratelje, nije dozvoljeno nepotrebno zadržavanje u Školi i školskom dvorištu o čemu se stara dnevni čuvar, koji je u slučaju potrebe dužan zatražiti i pomoć policije.
- (2) Zadržavanje i prisustvo učenika iz druge škole u Školi i školskom dvorištu dozvoljeno je samo u pratnji nastavnika ili trenera koji iznajmljuju školski prostor.
- (3) Televizijski i radio snimatelji, aktivisti humanitarnih i drugih organizacija, kulturni i sportski radnici ne mogu biti u Školi i školskom dvorištu i obavljati aktivnosti bez odobrenja direktora škole.

**Član 10.**

**(Pravila ponašanja u Školi)**

- (1) Za vrijeme boravka u Školi zabranjeno je:
  - kasniti na nastavu i ući u učionicu/kabinet poslije nastavnika
  - napustiti čas ili izaći iz učionice/kabineta bez odobrenja nastavnika
  - jesti ili piti za vrijeme časa
  - upotrebljavati duhanske proizvoda, ostale proizvoda za pušenje i proizvode koji izazivaju nikotinsku ovisnost, alkohol i sve vrste psihoaktivnih supstanci, te energetske napitke
  - posjedovati oružje ili hladno oruđe
  - izazivati, podsrekivati ili učestvovati u tuči
  - unositi sredstava, opremu ili uređaje koji mogu uzrokovati požar ili eksploziju,
  - unositi printani promotivni ili reklamni materijal bez odobrenja direktora
  - pisati, šarati ili urezivati po zidovima i inventaru Škole (unutra i vani)
  - bacati sve vrste otpadaka izvan koševa za otpatke
  - namjerno uništavati školsku imovine ili imovinu učenika i radnika škole ili otuđivati istu
  - upotrebljavati mobitele i slične uređaje za vrijeme trajanja nastave
  - zloupotrebljavati sredstva komunikacije i postavljati neprimjeren sadržaj na edukativnim platformama i drugim javnim platformama
  - neprimjereno se odnositi prema učenicima, radnicima škole i drugim posjetiocima škole
  - nositi odjeću s uvredljivim ili vulgarnim natpisima ili slikama
  - donositi skupocjene predmete i veće količine novca
  - izazivati nacionalnu, etničku, spolnu diskriminacije, rasnu ili vjersku netrpeljivost
  - dovoditi treća lica u prostor Škole bez odobrenja direktora



**JU OŠ „ŠEJH MUHAMED EF. HADŽIJAMAKOVIĆ“**

- (2) U školsko dvorište nikome nije dozvoljen ulazak vozilom, osim u izuzetnim slučajevima po odobrenju direktora.  
(Vozilo je svako sredstvo za prevoz osim invalidskih kolica. Tu spadaju: četverotočkaši, električni romobil i sl)
- (3) Učenicima i radnicima škole zabranjeno je unošenje svih stvari i predmeta koji nisu vezani za odgojno-obrazovni rad, odnosno za obavljanje poslova i zadataka.
- (4) Za sve stvari i predmete koji se službeno unose i iznose iz škole, a vlasništvo su škole mora postojati pismeno odobrenje direktora.
- (5) Svi učenici i radnici škole, kao i ostala lica koja koriste prostor Škole, dužni su brinuti se o školskoj imovini, opremi i tehničkim uređajima i držati ih urednim i ispravnim.

**Član 11.**

**(Boravak učenika u Školi)**

- (1) Učenik je dužan da se ponaša na način kojim se u punoj mjeri poštuje ličnost svih radnika škole i drugih učenika.
- (2) Učenik je dužan poštovati i sve druge starije osobe s kojima se sretne u Školi, pozdraviti ih i presirati im ukoliko s njima ostvari komunikaciju.
- (3) Učenici u Školu ulaze pod nadzorom dežurnog nastavnika, a izlaze po nadzorom nastavnika čiji je čas prethodio izlasku. Nastavnik je dužan ispratiti učenike do izlaza i pratiti njihovo ponašanje.
- (4) Učenici mogu boraviti u Školi za vrijeme realiziranja redovne nastave, vannastavnih aktivnosti i ostalih oblika odgojno-obrazovnog rada.
- (5) Učenici mogu boraviti u zajedničkom prostoru Škole (hol u prizemlju) dok čekaju početak nastave, samo uz odobrenje direktora škole.
- (6) Učenici se kreću školskim prostorijama hodajući, bez trčanja, tako da ne dovode druge učenike i/ili sebe u opasnost.
- (7) Učenici ulaze u svoju učionicu/kabinet samo ako je predmetni nastavnik unutra. U suprotnom čekaju predmetnog nastavnika ispred učionice/kabineta, stojeći u redu i ne praveći buku.
- (8) Učenici ne smiju bez dopuštenja ulaziti u zbornicu, kancelariju direktora, sekretara i referenta za plan i analizu ili učionice drugih razrednih odjeljenja.
- (9) Za vrijeme velikog odmora učenicima nije dozvoljeno napuštati školsko dvorište,

**Član 12.**

**(Radni prostor učenika)**

- (1) Na znak za početak nastave (školsko zvono) učenici trebaju biti na svojim mjestima u učionicama ili kabinetima ili sportskoj sali i pripremiti pribor za rad.
- (2) Mjesto u klupi/radno mjesto u kabinetima za prekičnu nastavu određuje razrednik ili predmetni nastavnik, u dogovoru sa učenicima.
- (3) Učenik može svoje mjesto promijeniti samo uz dopuštenje razrednika ili predmetnog nastavnika.
- (4) Nakon završetka nastave/časa učenici su dužni ostaviti čiste i uredne prostorije u kojima su boravili.

**Član 13.**

**(Upotreba školskog prostora i opreme)**

- (1) Učenici su dužni racionalno koristiti sredstva koja su im stavljena na raspolaganje.
- (2) Školski pribor i opremu za nastavu učenici mogu prenositi u druge učionice/kabinete ili



**JU OŠ „ŠEJH MUHAMED EF. HADŽIJAMAKOVIĆ“**

prostorije škole samo uz saglasnost predmetnog nastavnika.

- (3) Kompjutersku opemu učenici koriste samo uz nadzor predmetnog nastavnika i na način kako to odredi predmetni nastavnik.
- (4) Po završetku časa, učenici su dužni nastavna pomagala i školski pribor vratiti na mjesto.

**Član 14.**

**(Obaveza redara)**

- (1) U razrednom odjeljenju razrednik sedmično određuje dva redara po abecednom redu iz imenika učenika.
- (2) Redari imaju sljedeća zaduženja:
  - prije časa pregledati učionicu i o uočenim nepravilnostima ili oštećenjima upoznati predmetnog nastavnika
  - obrisati ploču i prema potrebi pomoći nastavniku u pripremi nastavnih sredstava i pomagala, na početku i na kraju časa
  - na početku svakog nastavnog časa prijaviti nastavnicima odsutne učenike
  - informisati direktora ili Stručnu službu o odsustvu predmetnog nastavnika sa časa,
  - za vrijeme malog odmora ili velikog odmora kada učenici zbog vremenskih prilika ne izlaze na školsko dvorište jedan od redara dužan je pratiti ponašanje učenika i u slučaju potrebe obavijestiti dežurnog nastavnika, razrednika ili predmetnog nastavnika,
  - posljednji napusiti učionicu, pregledati njeno stanje i upoznati nastavnika o uočenim oštećenjima ili nađenim predmetima, te iste odnijeti ih kod dnevnog čuvara
- (3) Ukoliko redar na vrši svoju dužnost u skladu s ovim Pravilnikom razrednik mu može produžiti dežurstvo i na sljedeću sedmicu.

**Član 15.**

**(Ponašanje učenika tokom nastave)**

- (1) Za vrijeme trajanja nastave ili vannastavnih aktivnosti učenici su dužni ponašati se na sljedeći način:
  - u učionici treba biti mir i primjerena radna atmosfera,
  - nije dozvoljeno bez dopuštenja predmetnog nastavnika razgovarati, šaptati, dovikivati se, šušcati, smijati se, okretati se, ustajati, šetati po razredu i sl.
  - nije dozvoljena upotreba mobilnih telefona ili drugih uređaja
  - kada učenik želi nešto pitati ili reći, treba svoju namjeru pokazati dizanjem ruke, a učenik kojeg je predmetni nastavnik prozvao, dužan je ustati ili postupiti prema zahtjevu predmetnog nastavnika
  - fiziološke potrebe obaviti za vrijeme odmora, bez bespotrebnog zadržavanja u toaletu.
- (2) Čas koji je u toku nije dozvoljeno prekidati bez opravdanog razloga ni od strane učenika niti od strane radnika ulascima u učionicu/kabinet.
- (3) Ulazak i izlazak nastavnika i drugih odraslih lica u učionicu, učenici pozdravljaju kratkim ustajanjem i ponovnim sjedanjem, bez pozdrava riječima i obraćanja pridošlici. Razgovor sa pridošlicom vodi nastavnik bez uplitanja učenika. Za vrijeme boravka pridošlice u učionici, učenici su dužni da budu posebno mirni. Izuzetno kada su u školskoj radionici ili izvode eksperimente ili kada rade pismene zadatke učenici ulazak nastavnika i drugih lica ne pozdravljaju ustajanjem.

**Član 16.**

**(Ponašanje učenika tokom odmora)**

- (1) Učenici imaju pravo na odmore između nastavnih sati.
- (2) Mali odmor traje 5 minuta, a veliki odmor 20 minuta.



**JU OŠ „ŠEJH MUHAMED EF. HADŽIJAMAKOVIĆ“**

- (3) Za vrijeme malih odmora učenici ne smiju napuštati školsku zgradu, a za vrijeme velikog odmora izlaze u školsko dvorište i ne smiju ga napuštati.
- (4) Ako vremenske prilike nisu pogodne za boravak na otvorenom, učenici ostaju u kabinetima u kojima imaju sljedeći čas.

**Član 17.**

**(Ponašanje učenika u sportskoj sali)**

- (1) U toku nastave tjelesnog i zdravstvenog odgoja u sportskoj sali učenici se dužni:
  - nositi sportsku odjeću i obuću prema uputi predmetnog nastavnika
  - prije početka časa u tišini se presvući u svlačionicama (svlačionice su odvojene posebno za djevojčice i posebno za dječake). Učenici u svlačionicama ostavljaju svoju odjeću, obuću i ruksake, a vrijedne predmete (poput mobitela, sata, naočala i eventualno nakita) ostavljaju prema uputi nastavnika.
- (2) U salu se može ući samo u čistim patikama. Zabranjeno je ulaziti u obući u kojoj je učenik došao u Školu.
- (3) Nakon odlaska iz svlačionica iste moraju ostati uredne i čiste.
- (4) Učenici ne smiju koristiti sportske rekvizite i sprave za vježbanje bez odobrenja i prisustva predmetnog nastavnika.

**Član 18.**

**(Ponašanje učenika u školskoj biblioteci)**

- (1) U biblioteci vlada mir i tišina.
- (2) Ako neko krši pravila ponašanja u biblioteci, bibliotekar je dužan udaljiti ga iz biblioteke.
- (3) Bibliotečku građu imaju pravo koristiti učenici i radnici škole.
- (4) Bibliotečku građu korisnicima na korištenje daje bibliotekar u redovnom radnom vremenu školske biblioteke.
- (5) Izvan radnog vremena biblioteke nije dopušteno ulaziti u biblioteku niti koristiti bibliotečku građu bez prisustva bibliotekara ili posebnog odobrenja direktora Škole.
- (6) Za korištenje izvan prostorija biblioteke učenici mogu posuditi istovremeno dvije knjige na rok od 14 dana, te u propisanom roku vratiti posuđenu bibliotečku građu.
- (7) Učenici zadužuju udžbenike na početku školske godine i iste su dužne vratiti neoštećene na kraju školske godine.
- (8) Na kraju školske godine učenici su dužni vratiti svu posuđenu bibliotečku građu.
- (9) Prije ispisa iz Škole, učenici su dužni vratiti svu posuđenu bibliotečku građu.
- (10) Učenici su dužni čuvati posuđenu bibliotečku građu od svakog oštećenja i uništavanja. Nije dozvoljeno pisati, crtati, šarati po knjigama ili ih oštećivati.
- (11) Učenik koji izgubi, ošteti ili uništi posuđenu bibliotečku građu odgovoran je za štetu, a za oštećeni ili izgubljeni primjerak dužan je nabaviti zamjenski.

**Član 19.**

**(Upotreba mobitela i drugih uređaja)**

- (1) Za vrijeme trajanja školskog časa zabranjeno je svako korištenje mobitela i drugih sličnih uređaja. Zabrana se odnosi na pisanje poruka, obavljanje telefonskih razgovora, slušanja muzike, igranje igrice, snimanja zvuka ili fotografisanje nastavnog procesa.
- (2) Za vrijeme trajanja nastave mobilni telefon se mora odložiti u ruksak odnosno ne smije biti na vidnom mjestu.
- (3) Predmetni nastavnik ima pravo učeniku oduzeti mobilni telefon ili drugi uređaj čijim korištenjem ometa nastavni proces i predati ga razredniku.
- (4) Razrednik je dužan pozvati roditelja/staratelja učenika i obavijestiti ga o prekršaju koji je učenik učinio.



**JU OŠ „ŠEJH MUHAMED EF. HADŽIJAMAKOVIĆ“**

(5) Mobilni telefon ili drugi uređaj koji je opravdano oduzet učeniku isključivo roditelj/staratelj može preuzeti od razrednika uz obavezu dolaska u Školu.

**Član 20.**

**(Dužnosti radnika Škole)**

- (1) Radnici škole dužni su na vrijeme doći na posao, uredni i primjereno odjeveni, te radno vrijeme koristiti kontinuirano za obavljanje radnih zadataka.
- (2) Nastavnik je dužni doći na posao najmanje 15 minuta prije početka nastave, a na znak školskog zvona nastavnik je dužan biti u svojoj učionici/kabinetu.
- (3) Radnici škole dužni su uvažavati individualne karakteristike učenika, njihove potrebe, saslušati učenika koji im se obratio ako ima problem i reagovati zavisno od situacije.
- (4) Radnici škole dužni su opremu i sredstva za rad koristiti s pažnjom dobrog domaćina i u skladu sa namjenom, te za istu odgovaraju u slučaju učinjene štete
- (5) Po završetku rada radnici su dužni ugasiti svjetla i elektroničke uređaje, pregledati namještaj, opremu i sredstva za rad u svom prostoru rada, te o uočenoj šteti obavijestiti radnika za servisno-tehničku podršku ili direktora.
- (6) Svi radnici škole dužni su prisustvovati školskim priredbama i na istima održavati red i disciplinu.
- (7) Radnicima škole nije dozvoljeno da učenicima daju vlastite lijekove, osim u izuzetnim slučajevima uz saglasnost roditelja/staratelja.
- (8) U prostoru škole zabranjen je fizički i verbalni međusobni obračun radnika škole ili sa trećim licima.
- (9) Radnici škole dužni su postupati po bezbjednosnim smjernicama Škole u slučaju požara, prirodnih i drugih nepogoda ili opasnosti.

**Član 21.**

**(Pravila ponašanja nastavnika)**

- (1) Nastavnik je dužan održavati red i disciplinu u razredu, kao i pri ulasku i izlasku učenika iz učionice/kabineta.
- (2) Obaveza nastavnika je da evidentira svaki čas i odsutne učenike u eDnevnik, kao i kašnjenje učenika.
- (3) Nastavnik ne smije odobriti učeniku da bez opravdanog razloga za vrijeme časa izađe iz učionice.
- (4) Ako učenik iz opravdanog razloga ne može nastaviti praćenje nastave, predmetni nastavnik dužan je učenika uputiti razredniku i Stručnoj službi škole s ciljem odobrenja učeniku odlazak kući, uz obaveznu kontaktiranje roditelja i dobijanje njihove saglasnosti.
- (5) Ako učenik onemogućava realiziranje nastave, nastavnik ga može uputiti Stručnoj službi škole.
- (6) Zabranjeno je fizičko kažnjavanje i kažnjavanje učenika udaljavanjem sa nastave.
- (7) Nastavnicima nije dopušteno:
  - za vrijeme nastave kazniti učenika udaljavanjem sa časa, a ako se učenika mora udaljiti sa časa, učenik mora biti zbrinut,
  - uputiti učenika izvan školskog prostora bilo kojim povodom,
  - za vrijeme časa neopravdano napuštati učionicu i učenike ostavljati same,
  - koristiti neprimjerene riječi u komunikaciji sa učenicima,
  - ostvarivati neprimjeren fizički kontakt sa učenicima,
  - favorizovati ili diskriminirati pojedine učenike po bilo kojem osnovu,
  - koristiti mobilni telefon u toku časa u svrhu telefoniranja ili pisanog komuniciranja, izuzev kada komunicira sa direktorom ili stručnim saradnicima.



---

**JU OŠ „ŠEJH MUHAMED EF. HADŽIJAMAKOVIĆ“**

**Član 22.**

**(Dežurstvo radnika Škole)**

- (1) Dežurni radnici u Školi su: nastavnici razredne nastave i predmetni nastavnici, dnevni čuvar zadužen za sigurnost i radnici na održavanju higijene.
- (2) Raspored, trajanje i obaveze dežurnih radnika određuje direktor, odnosno sekretar.
- (3) Raspored dežurstva nastavnika sastavni je dio Rasporeda časova i objavljuje se na oglasnoj ploči Škole.
- (4) Obaveze dežurnih radnika su da:
  - prate ulazak učenika i drugih posjetilaca u Školu i njihov izlazak,
  - prate ponašanje učenika za vrijeme malog i velikog odmora,
  - prate ponašanje učenika na hodnicima i reaguju u situaciji sukoba, nasilja među učenicima i sl.
  - zabrane boravak trećih lica u dvorištu škole i obrate se dnevnom čuvaru ukoliko se lice ogлуši na opomenu,
  - izvješavaju direktora, odnosno sekretara o događajima tokom dežure.
- (5) Svim posjetiocima i radnicima škole zabranjeno je bilo kakvo unošenje i iznošenje predmeta bez pisanog odobrenja direktora.
- (6) Svi radnici škole trebaju obratiti pažnju na predmete koje posjetilac nosi sa sobom.

**Član 23.**

**(Izostanci radnika)**

- (1) Radnici su dužni o svojim izostancima sa posla ili kašnjenjima obavijestiti sekretara, pedagoga ili direktora škole, telefonskim pozivom ili pisanom porukom.
- (2) Obavijest o otvorenom bolovanju radnici su dužni dostaviti na službenu e-mail adresu Škole.
- (3) Opravdano odsustvo sa rada bliže je uređeno u članu 47. Pravilnika o radu Škole.

**Član 24.**

**(Komuniciranje i kontakt sa roditeljima)**

- (1) Termini informativnih sastanaka razrednika i roditelja istaknuti su na zvaničnoj web stranici Škole za svako polugodište.
- (2) Termini konsultacija predmetnog nastavnika i roditelja organizuju se prema potrebi roditelja na način da roditelj svoj termin konsultacija sa predmetnim nastavnikom dogovori i zakaže putem e-maila.
- (3) Informativnim sastancima i konsultacijama sa razrednikom ili predmetnim nastavnikom može prisustvovati isključivo roditelj/staratelj učenika.
- (4) Roditelj ima pravo pismeno izvijestiti direktora ako mu razrednik ili predmetni nastavnik odbije dati blagovremeno i potrebno obavještenje o uspjehu njegovog djeteta.
- (5) Svi radnici Škole dužni su prema roditeljima odnositi se s poštovanjem, uvažavanjem i ljubazno.
- (6) Informacije koje se razmjenjuju sa roditeljima treba držati povjerljivim.

**Član 25.**

**(Obaveze roditelja/staratelja)**

- (1) Obaveza roditelja/staratelja je upoznati se, prihvatiti i poštovati Pravilnik o kućnom redu i drugim aktima Škole.
- (2) Roditelj/staratelj je dužan redovno dolaziti na roditeljske sastanke i informativne razgovore.



**JU OŠ „ŠEJH MUHAMED EF. HADŽIJAMAKOVIĆ“**

- (3) U posljednje dvije sedmice oba polugodišta ne organizuju se roditeljski sastanci i individualni informativni razgovori.
- (4) U komunikaciji sa nastavnicima i stručnim saradnicima, poželjno je komunicirati mirno, ljubazno i s poštovanjem, čak i ako postoji neslaganje, te aktivno slušati stavove nastavnika i stručnih saradnika i biti spraman na saradnju.
- (5) Roditelji/staratelji bi trebali biti otvoreni za konstruktivnu povratnu informaciju o napretku i ponašanju djeteta u Školi.
- (6) Roditelji/staratelji ne smiju ometati nastavnike u vrijeme trajanja nastavnog časa.
- (7) Roditelji/staratelji koji čekaju dijete ili nastavnika tokom trajanja nastavnog časa, dužni su boraviti u holu Škole, a nikako pred vratima učionice.
- (8) Zabranjen je odlazak do učionice roditeljima/starateljima i trećim licima, te nepotrebno zadržavanje u prostoru Škole.
- (9) Roditelji/staratelji i treća lica mogu razgovarati sa direktorom i Stručnom službom samo uz prethodnu najavu.
- (10) U prostoru Škole roditeljima/starateljima i trećim licima zabranjeno je pušenje, konzumiranje alkohola i narkotika, nedolično ponašanje i psovanje.
- (11) Roditelji/staratelji i drugi posjetioци Škole dužni su se javiti dnevnom čuvaru prilikom ulaska u Školu i navesti razlog posjete.

**Član 26.**

**(Izostanci učenika, kašnjenje, dopušteno napuštanje nastave)**

- (1) Učenici ne smiju bez dopuštenja kasniti na nastavu, napustiti nastavu ili izostajati sa časova.
- (2) Učenici koji zakasne, vrijeme do narednog časa provode u prostoru Škole i na nastavu ulaze sljedeći čas, kako je to navedeno u članu 5. ovog Pravilnika.
- (3) Za dopuštenje za odlazak iz Škole zbog bolesti, povrede ili drugog opravdanog razloga učenik se treba obratiti predmetnom nastavniku ili razredniku, a potom i Stručnoj službi, koji će prije odlaska učenika iz Škole o tome obavijestiti učenikove roditelje/staratelje.

**Član 27.**

**(Odobrenje za izostanak s nastave)**

Učenik može izostati s nastave ukoliko je roditelj/staratelj unaprijed tražio i dobio odobrenje i to:

- u hitnim slučajevima, usmeno od razrednika/nastavnika s njegovog časa,
- pismeno od razrednika za izostanak do tri radna dana,
- pismeno od direktora za izostanak do pet radnih dana,
- Nastavničkog vijeća za izostanak do 15 radnih dana.

**Član 28.**

**(Pravdanje izostanaka učenika s nastave)**

- (1) Izostajanje sa nastave i kašnjenje na nastavu roditelji/staratelji učenika dužni su opravdati ispričnicom/ljekarskim uvjerenjem koju je potpisao i ovjerio ljekar nadležne zdravstvene ustanove, tj. ljekar koji prati zdravstveno stanje učenika.
- (2) Ispričnicu/ljekarsko uvjerenje kojim se pravda izostanak učenika, roditelj/staratelj dužan je dostaviti razredniku u roku od 7 (sedam) dana.
- (3) U toku školske godine roditelj/staratelj može lično opravdati izostanak svog djeteta bez ispričnice/ljekarskog uvjerenja, u trajanju od najviše pet dana u toku jednog polugodišta, odnosno deset dana u toku nastavne godine.
- (4) Sve izostanke, osim bolesti učenika, roditelji/staratelji moraju najaviti unaprijed i



**JU OŠ „ŠEJH MUHAMED EF. HADŽIJAMAKOVIĆ“**

pismeno zatražiti odobrenje kako je to navedeno u članu 27. ovog Pravilnika.

- (5) U slučaju odsustva učenika zbog bolesti, roditelj/staratelj je u obavezi isti dan obavijestiti razrednika.
- (6) Neopravdanim izostankom se smatra izostanak s nastave za koji roditelj razredniku nije dostavio ispričnicu/ljekarsko uvjerenje, nije lično opravdao izostanak ili nije dobio odobrenje iz člana 27. ovog Pravilnika za izostanak učenika s nastave.

### **III – PRAVILA MEĐUSOBNIH ODNOSA**

#### **Član 29.**

##### **(Međusobni odnosi učenika)**

- (1) Za vrijeme boravka u Školi i izvan nje učenik je dužan odnositi se prema drugim učenicima s uvažavanjem i poštivanjem različitosti.
- (2) U međusobnim odnosima učenici su dužni ponašati se pristojno, paziti na vlastito dostojanstvo i dostojanstvo drugog učenika, čuvati lični ugled i ugled drugog učenika, pružiti pomoć drugima i prihvatiti pruženu pomoć, uvažavati i poštovati drugoga.
- (3) Učenici ne smiju ometati druge učenike u učenju i praćenju nastave.
- (4) U međusobnoj komunikaciji sa ostalim učenicima u razredu i u Školi učenici su dužni pridržavati se normi lijepog ponašanja i lijepog govora.
- (5) Međusobne sporove učenici ne smiju rješavati svađom, fizičkim obračunom, uvredama, psovkama i drugim neprimjerenim načinima.
- (6) Ako učenik misli da mu je učinjena bilo kakva nepravda, ima se pravo na pristojan način obratiti predmetnom nastavniku, razredniku ili Stručnoj službi.

#### **Član 30.**

##### **(Međusobni odnosi učenika i radnika škole)**

- (1) Pri dolasku u Školu učenik je dužan ljubazno pozdraviti sve radnike Škole s kojima se sretne.
- (2) U obraćanju svim radnicima Škole učenik je dužan koristiti pristojan rječnik i odnositi se prema njima s uvažavanjem i poštovanjem.
- (3) Ustajanjem treba pozdraviti lice koje ulazi u učionicu za vrijeme nastavnog časa.
- (4) Odnos između radnika Škole i učenika mora biti na razini međusobnog uvažavanja.
- (5) Radnici škole dužni su učenicima pružiti pomoć kada im je potrebna, uvažavati ličnost učenika i njihovu različitost.

#### **Član 31.**

##### **(Međusobni odnosi radnika škole)**

- (1) Radnici Škole jedini prema drugima dužni su se odnositi s međusobnim uvažavanjem i poštovanjem, te odgovorno, savjesno i profesionalno ispunjavaju svoje obaveze prema učenicima, kolegama, roditeljima, bez utjecaja predrasuda na njihovu objektivnost u radu
- (2) Radnici Škole dužni su međusobno sarađivati s ciljem kvalitetne realizacije odgojno-obrazovnog rada.
- (3) Radnici škole ne smiju zloupotrebljavati svoj autoritet i ne smiju dopustiti da lični interesi i odnosi utječu na etično i profesionalno obavljanje radnih obaveza.
- (4) Radnici Škole dužni su pridržavati se zakonskih i podzakonskih propisa i internih akta Škole, te izvršavati naloge direktora.



**JU OŠ „ŠEJH MUHAMED EF. HADŽIJAMAKOVIĆ“**

**IV – PRAVILA SIGURNOSTI I ZAŠTITE OD SOCIJALNO-NEPRIHVATLJIVIH OBLIKA PONAŠANJA, DISKRIMINACIJE, NEPRIJATELJSTVA I NASILJA**

**Član 32.**

**(Siguran boravak i rad u Školi)**

- (1) Škola je dužna obezbijediti siguran boravak i rad u Školi svim učenicima i radnicima.
- (2) U slučaju narušenih sigurnosnih uslova u Školi (požar, prirodno i druge nepogode, eksplozija, napad i sl) direktor Škole dužan je djelovati na način kao je to propisano Planom evakuacije i postupanja u kriznim događajima.
- (3) U slučaju narušenog zdravstvenog stanja učenika predmetni nastavnik i Stručna služba dužni su obavijestiti roditelje/staratelje i pozvati hitnu pomoć po potrebi.

**Član 33.**

**(Videonadzorni sistem)**

- (1) Škola posjeduje videonadzorni sistem u unutrašnjem i vanjskom prostoru.
- (2) Svrha uspostavljanja videonadzornog sistema u Školi jeste neophodna optimizacija sigurnosti učenika, radnika, roditelja i posjetilaca škole, u toku nastavnog procesa u prostoru škole i školskom dvorištu, kao i sigurnost objekata i imovine škole u periodu kada se ne izvodi nastavni proces (noćni sati, vikendi, neradni dani i blagdani, periodi kolektivnog godišnjeg odmora i sl)
- (3) Monitoring u realnom vremenu nad videonadzorom ima dnevni čuvar i direktor škole.
- (4) U skladu sa Zakona o zaštiti ličnih podataka Bosne i Hercegovine obezbjeđuje se zaštita i obrada ličnih podataka prikupljenih putem videonadzora.
- (5) Direktor, kao ni bilo koja druga osoba, ne smije koristiti podatke o osobama prikupljene videonadzornim sistemom zaštite izvan njihove zakonske namjene, a raspolaganje snimkama dopušteno je samo direktoru škole.
- (6) Pravna i fizička lica koja traže pristup arhivi videozapisa u svrhu utvrđivanja činjenica i događanja oko dvorišta škole koje je u videokrugu nadzornog sistema, mogu pristupiti posredovanjem nadležne policijske uprave i uz službeni nalog.
- (7) Videonadzorni sistem se koristi u svrhu:
  - utvrđivanja narušavanja sigurnosnih okolnosti u Školi i u dvorištu škole,
  - utvrđivanja nastale štete na objektu škole,
  - utvrđivanja činjenica u vezi sa vršnjačkim nasiljem i ponašanjem učenika i radnika škole u toku trajanja nastave i
  - u druge svrhe koje Škola smatra nužnim za utvrđivanje činjeničnih stanja i okolnosti u vezi sa nesmetanim radom škole.

**Član 34.**

**(Protivpožarna zaštita)**

- (1) Protivpožarna zaštita uspostavljena je u svim prostorijama škole, a to podrazumijeva opremu za detekciju dima, alarmne uređaje, panik rasvjetu, hidrante i protivpožarne aparate.
- (2) U Školi nije dozvoljeno korištenje netestiranih nastavnih sredstava i drugih uređaja koji bi mogli prouzrokovati požar.
- (3) U Školi nije dozvoljeno korištenje električnih grijalica izvan prostorija u kojima je to posebno odobreno.
- (4) U Školi nije dozvoljeno koristiti električna kuhala za vodu izvan prostorija kuhinje.



**JU OŠ „ŠEJH MUHAMED EF. HADŽIJAMAKOVIĆ“**

- (5) Svi radnici Škole obavezni su jednom u dvije godine pohađati obuku iz protivpožarne zaštite.
- (6) Sve aktivnosti na zaštiti od požara i drugih kriznih situacija provode se u skladu sa školskim Planom evakuacije.

**Član 35.**

**(Sigurnost i zaštita učenika)**

- (1) Škola je obavezna:
  - stvarati uvjete za zdrav mentalni i fizički razvoj, te dobrobit učenika,
  - pružati savjetodavni rad učenicima,
  - pravovremeno uočiti određene faktore rizika koji mogu ugroziti psihofizičku dobrobit učenika,
  - sprečavati neprihvatljive oblike ponašanja,
  - brinuti se o sigurnosti učenika,
  - osigurati uvjete za uspješnost svakog učenika u učenju i vladanju,
  - pratiti zdravstveno stanje učenika dok boravi u Školi i o tome obavještavati roditelje i
  - voditi evidenciju o neprihvatljivim oblicima ponašanja i/ili drugim faktorima koji mogu ugroziti najbolji interes učenika i zaštititi učenika, te provoditi mjere odgojno-obrazovne podrške i stručnog tretmana učenika u skladu sa važećim propisom.
- (2) Škola je obavezna na početku školske godine upoznati učenike, roditelje/staratelje i nastavnike s njihovim pravima, dužnostima, obavezama i odgovornostima, kao i o nadležnostima određenih institucija za rješavanje problema.
- (3) Svi učesnici odgojno-obrazovnog rada i svi radnici škole dužni su preduzimati mjere zaštite prava učenika, te o svakom kršenju tih prava, posebno o oblicima tjelesnog ili duševnog nasilja, cyber nasilja, seksualnog nasilja, zanemarivanja ili nemarnog postupanja, zlostavljanja ili izrabljivanja učenika, odmah obavijestiti direktora koji je dužan postupiti u skladu sa zakonom.
- (4) U Školi se ne dozvoljava bilo koji oblik zastrašivanja, zlostavljanja, fizičkog kažnjavanja, vrijeđanja, ponižavanja, degradiranja ili bilo kojeg oblika ponašanja koji narušava psihofizičko zdravlje učenika.
- (5) U slučaju sukoba prava, prednost se daje onom pravu, tumačenju ili djelovanju koje će najviše koristiti interesu djeteta.
- (6) Škola je obavezna postupati u skladu sa Smjernicama za postupanje u slučajevima nasilja nad djecom u BiH.
- (7) Škola je obavezna odmah po saznanju da postoji mogućnost da je ugrožen najbolji interes učenika (npr. nasilje nad ili među učenicima, zanemarivanje i sl.) organizirati multisektorski sastanak kojem u isto vrijeme prisustvuju: roditelji svih uključenih učenika, stručna služba škole, direktor škole, razrednik/razrednici, predstavnik nadležne službe za socijalni rad, predstavnik nadležne policijske uprave, predstavnik nadležnog centra za mentalno zdravlje i predstavnici drugih službi u zajednici, u cilju izrade Individualnog plana podrške i Individualnog plana brige.

**Član 36.**

**(Zaštita privatnosti učenika i podataka o učenicima)**

- (1) Škola ima službenu web stranicu [www.ossmeh.edu.ba](http://www.ossmeh.edu.ba) i zvaničnu Facebook stranicu.
- (2) Fotografije, audio ili video zapisi o školskim aktivnostima objavljuju se na web ili Facebook stranici Škole, a sadržaj koji se objavljuje odobrava direktor.
- (3) Roditelji/stratelji učenika zadržavaju pravo da se prema njihovom zahtjevu uklone sadržaji sa zvaničnih školskih internet stranica, a koji se tiču njihove djece ili njih.
- (4) Televizijski i radio snimatelji, aktivisti humanitarnih i drugih organizacija, kulturni i sportski radnici, lica i organizacije izvan škole, ne mogu u Školi obavljati bilo kakve aktivnosti niti objavljivati sadržaj školskih aktivnosti, fotografije ili videopapise bez odobrenja direktora.



**JU OŠ „ŠEJH MUHAMED EF. HADŽIJAMAKOVIĆ“**

- (5) Sve izjave ili nastupi učenika i radnika škole u medijima, a koje se tiču rada Škole, isključivo odobrava direktor.
- (6) Objavljivanje fotografija, videozapisa i izjava učenika ili radnika, medijskim kućama ili drugim pravnim licima odobrava direktor škole uz pismeno odobrenje roditelja/staratelja učenika, odnosno saglasnost radnika.
- (7) S ciljem efikasnog funkcioniranja odgojno-obrazovnog sistema dio evidencije o učenicima vodi se kroz sistem EMIS.
- (8) Obrada ličnih podataka u EMIS sistemu vrši se uz korištenje obaveznih mjera tehničke zaštite, a sva lica koje dolaze u kontakt s podacima u EMIS-u, moraju biti upoznati da dolaze u kontakt s podacima koji predstavljaju službenu tajnu, te da se moraju pridržavati propisa o zaštiti ličnih podataka BiH, te da svaka zloupotreba podataka iz baze podataka za sobom povlači odgovornost kao i sankcije u skladu sa zakonom.

**V – ZABRANA SVIH OBLIKA REKLAMIRANJA I PRODAJE PROIZVODA KOJI NISU U SKLADU SA ETIKOM, NAČELIMA I CILJEVIMA ODGOJNO-OBRAZOVNOG RADA**

**Član 37.**

**(Zabrana reklamiranja i prodaje)**

U Školi je zabranjen svaki oblik reklamiranja i prodaje proizvoda koji nisu u skladu sa etikom, načelima i ciljevima odgojno-obrazovnog rada, koji mogu ugroziti najbolji interes učenika i za koje nije pribavljena saglasnost Ministarstva.

**VI – NAČIN POSTUPANJA PREMA IMOVINI ŠKOLE I POSTUPAK SA NAĐENIM STVARIMA**

**Član 38.**

**(Postupanje prema imovini Škole)**

- (1) Svi radnici i učenici dužni su brinuti se o imovini Škole.
- (2) Posjetiocima škole nije dozvoljeno korištenje školske imovine niti njeno uništavanje.
- (3) Radnici Škole dužni su racionalno koristiti školsku opremu, nastavni i kancelarijski materijal koji su im stavljeni na raspolaganje.
- (4) Nakon završetka dnevnog rada radnici su dužni uredno pospremiti radne materijale, zatvoriti prozore, isključiti električne aparate i zaključati radne prostorije.
- (5) Učenici i radnici dužni su obavijestiti dežurnog nastavnika, direktora ili radnika sa servisno-tehničku podršku o uočenim oštećenjima u školskom prostoru.
- (6) Radnicima nije dozvoljeno koristiti školsku imovinu, prostorije i resurse za lične potrebe ili poslovne aktivnosti izvan nastavnog procesa.
- (7) U slučaju da učenik neprimjerenim odnosom nanese štetu školskoj imovini izreći će mu se odgojno-disciplinska mjera za povredu učeničkih dužnosti.
- (8) Roditelji/stratelji materijalno odgovaraju za štetu koju je prouzrokovalo njihovo dijete, a radnici odgovaraju lično.

**Član 39.**

**(Postupanje sa nađenim stvarima)**

- (1) Škola nije odgovorna za lične stvari, vrijedne predmete i novac koje učenici i radnici donose u Školu.
- (2) Stvari zaboravljene u učionicama i zajedničkim prostorijama predaju se dnevnom čuvaru, koji o tome sačinjava pismenu zabilješku.



**JU OŠ „ŠEJH MUHAMED EF. HADŽIJAMAKOVIĆ“**

- (3) Roditelji/staratelji čije je dijete izgubilo/zaboravilo lične stvari, mogu kod dnevnog čuvara provjeriti i uz adekvatno obrazloženje prepoznati stvari svoga djeteta.
- (4) Ako se prilikom obilaska prostorija škole nađe povjerljiv materijal poduzimaju se mjere da se takav materijal obezbijedi zaključavanjem ili prenošenjem na odgovarajuće mjesto do početka radnog vremena, o čemu se obavještava direktor.

**VII – KODEKS ODIJEVANJA UČENIKA I RADNIKA ŠKOLE**

**Član 40.**

**(Kodeks odijevanja učenika)**

- (1) Učenici su dužni u Školu dolaziti uredni i čisti, vodeći računa o ličnoj higijeni.
- (2) Nije dozvoljeno oblačenje sportske odjeće (trenerke) osim na časovima Tjelesnog i zdravstvenog odgoja i organizovanim izletima.
- (3) Smatra se da je učenik neprikladno odjeven ako u Školu dolazi u hlačama s plitkim strukom, hlačama sa rupama koji pokazuju gole dijelove tijela, prekratkoj majici koja pokazuje gole dijelove tijela, kratkoj suknji ili šorcu iznad koljena, kratkim hlačama.
- (4) Učenik je neprikladno odjeven ukoliko u Školu dolazi golih ili polugolih leđa, otkrivenih ramena (majice na bretele) i s dekoltiranim izrezom, te u pripijenim helankama koje su u kombinaciji s kratkim majicama (helanke se mogu nositi ako se preko njih nosi duža majica, tunika, džemper ili haljina).
- (5) Učenici u Školu ne može dolaziti u prozirnoj i pretijesnoj odjeći s uvredljivim ili nepristojnim natpisima, porukama, riječima, znakovima ili slikama.
- (6) Učenici u Školu ne mogu dolaziti u japankama, papučama i obući s visokim potpeticama.
- (7) Tokom časa učenici ne mogu nositi bilo kakve kape, kačkete, šešire, kapuljače i sunčane naočale.
- (8) Prilikom organiziranih posjeta određenim manifestacijama, institucijama i sl. učenici su dužni voditi računa o prikladnom odijevanju.
- (9) U Školu je neprikladno dolaziti upadno našminkan, pirsingom, nečiste, neuredne kose, neprikladne frizure ili kose obojene fluorescentnim bojama.
- (10) U svim slučajevima kada se učenik ne bude pridržavao kodeksa odijevanja, predmetni nastavnik, razrednik, direktor ili Stručna služba učenika može poslati kući da zamijeni odjeću/obuću i o tome obavijestiti roditelja/staratelja, upisati izostanak i razlog, a razrednik će te časove klasificirati kao neopravdane.

**Član 41.**

**(Kodeks odijevanja radnika)**

- (1) Radnici su dužni na posao dolaziti uredni i čisti vodeći računa o ličnoj higijeni i čistoći odjeće i obuće.
- (2) Neprikladnom odjećom smatra se naročito:
  - a) za muškarce: kratke pantalone ili duge pantalone koje u stojećem stavu dosežu iznad koljena, majica koja nema rukave, uska i prozirna odjeća te obuća otvorenih prstiju,
  - b) za žene: previše otvoren vratni izrez bluže/majice i/ili bluza/majica bez leđa i bez rukava, suknja ili kratke pantalone koje u stojećem stavu dosežu pet centimetara iznad koljena, uske i prozirne suknje kao i ostala uska i prozirna odjeća, te neprimjerena obuća (papuče ili druga obuća otvorenih prstiju koja se sa zadnje strane ne pridržava uz nogu),
  - c) sportska odjeća izuzev za nastavnike tjelesnog odgoja, veća oznaka ili natpis na odjeći, simbol koji može biti uvredljiv ili iritantan po bilo kojem temelju, nepokriveni torzo, te nošenje



**JU OŠ „ŠEJH MUHAMED EF. HADŽIJAMAKOVIĆ“**

kape u službenim prostorijama.

(3) Radnik škole po dolasku na posao i do završetka posla može nositi mantil.

**Član 42.**

**(Nepoštivanje kućnog reda)**

(1) Postupanje prema odredbama ovoga Pravilnika obavezano je za sve učenike i radnike Škole.

(2) Učenik koji postupi suprotno odredbama ovog Pravilnika odgovoran je za lakšu ili težu povredu učeničkih dužnosti.

(3) Radnik koji postupi suprotno odredbama ovog Pravilnika odgovoran je za povredu radne obaveze.

(4) Roditelj/staratelj ili drugi posjetioci koji za vrijeme boravka u Školi krše Pravilnik o kućnom redu odgovorni su za štetu koju pretrpi Škola, a dnevni čuvar treba da ih udalji iz prostora Škole.

(5) Ako lice iz stava (4) ovog Pravilnika odbije da se udalji iz prostora Škole, dnevni čuvar će se obratiti najbližoj policijskoj stanici.

**VIII – ZABRANA DISKRIMINACIJE**

**Član 43.**

**(Zabrana diskriminacije)**

(1) U Školi je zabranjena svaka vrsta diskriminacije i uznemiravanje učenika i radnika.

(2) Diskriminacijom će se smatrati svako različito postupanje uključujući svako isključivanje, ograničavanje ili davanje prednosti utemeljeno na stvarnim ili pretpostavljenim osnovama prema bilo kojem licu ili grupi lica i onima koji su s njima u rodbinskoj ili drugoj vezi na osnovu njihove rase, boje kože, jezika, vjere, etničke pripadnosti, invaliditet, starosna dob, nacionalnog ili socijalnog porijekla, veze s nacionalnom manjinom, političkog ili drugog uvjerenja, imovnog stanja, članstva u sindikatu ili drugom udruženju, obrazovanja, društvenog položaja i spola, spolnih karakteristika, kao i svaka druga okolnost koja ima za svrhu ili posljedicu da bilo kojem licu onemogući ili ugrožava priznavanje, uživanje ili ostvarivanje na ravnopravnoj osnovi, prava i sloboda.

(3) Uznemiravanje je svako ponašanje koje ima za cilj ili stvarno predstavlja povredu dostojanstva učenika i radnika, a koje uzrokuje strah ili neprijateljstvo, ponižavajuće ili uvredljivo okruženje.

**IX – PRIJELAZNE I ZAVRŠNE ODREDBE**

**Član 44.**

**(Postupak donošenja Pravilnika o kućnom redu)**

(1) Pravilnik o kućnom redu donosi Školski odbor, na prijedlog Nastavničkog vijeća i uz konsultacije sa Sindikatом škole, a nakon provedene rasprave na Vijeću roditelja i Vijeću učenika.

(2) Izmjene i dopune ovih Pravilnika o kućnom redu vršit će se na način i po postupku predviđenom za njihovo donošenje.

(3) Odredbi Pravilnika o kućnom redu obavezna su se pridržavati sva lica koja borave u školskom prostoru.



---

**JU OŠ „ŠEJH MUHAMED EF. HADŽIJAMAKOVIĆ“**

**Član 45.**

**(Stupanje na snagu)**

Pravilnik o kućnom redu JU OŠ „Šejh Muhamed ef. Hadžijamaković“ Sarajevo stupa na snagu danom donošenja i bit će objavljen na oglasnoj ploči i web stranici Škole.

Djelovodni broj: 01-1-1004-1/25

Datum: 14.10.2025. godine

**ZAMJENIK PREDSJEDNIKA ŠKOLSKOG ODBORA**

*Amela Čehajić*